

L'emprim da matg resta en Grischun di da lavur

Parlament ha revedì la lescha davart ils dis da paus publics

■ **(anr/fa) Cun la finamira da proteger vinavant la quietezza durant ils dis da festa ha il cussegl grond approvà un-animamain la revisiun parziala da questa lescha. Las vischnancas survegnan qua dapli cumpetenzas.** «La lescha vertenta davart ils dis da paus publics deriva da l'onn 1986, ils ultims bunamain 30 ons n'è ella betg pli vegnida midada. Entant hai dentant dà midaments hai dà dentant en nossa societad», ha ditg *Christina Bucher-Brini* (ps, Cuir), la presidenta da la cumissiun predeberanta. Che la glieud sa cuntogna ozendi auter durant ses temp liber ed haja era il giavisch da sa scuntrar, da prender part ad arranschaments culturals e da far sport, ha ella concretisà. Durant la sessiun da zercladur da l'onn 2007 era vegnida inoltrada en il cussegl grond l'incumbensa Meyer Persili, la quala dumandava era ina revisiun da la lescha dals dis da paus publics. «Dapi quella giada èn il cuntegnair ed ils basegns anc ina giada sa midads, perquai uss questa revisiun parziala», ha ditg Bucher-Brini. Senza cuntroversch ha decis il parlament da tractar la lescha.

«Protecziun dals sentiments religios vinavant garantida»

Suenter la procedura da consultaziun èn entradas 35 posiziuns da quatter

partidas, 16 autoritads communalas e sis chantunalas. Mo tschintg s'han expressas da princip plitost cunter il midament da la lescha dals dis da paus publics. Arranschaments che servan a la sanadad, a la recreaziun, al sport, a la cultura u al divertiment duain esser pussaivlas en avegnir als dis da paus publics, cun excepziun dals firads impurtants sco Venderdi sontg, Pasca, Tschuncaisma, Nadal ed il Di da rogaziun federala. «Per pudair realisar durant quels dis tuttina occurrenzas d'organisations la lubientscha da las vischnancas, las qualas observan ch'ils sentiments religios dals abitants na vegnian betg tangads», ha declarà la presidenta da la cumissiun, «in open air sper la baselgia p.ex. vegn ad esser scumandà era en l'avegnir, mussar in film en in kino è dentant pussaivel.»

Cumissiun mo en in punct da different avis

La regenza ha survegnì laudals dals commembers da la cumissiun predeliberanta per sia proposta da revisiun. Betar la dumonda, sche l'emprim da matg duai esser in di da festa uffizial u betg devi duas opiniuns. «Nus essan da l'avis ch'ils 1. da matg, ch'è in di da festa sin tut il mund, duess esser quai era en Grischun», ha ditg la pledadra da la

minoritad da la cumissiun *Erika Cahenzli-Philipp* (ps, Tschintg Vitgs). «Quel di tira endament l'impurtanza da la giustia sociala», ha ditg *Jon Pult* (ps, Cuir) ed appellà a las deputadas e deputads da tut las partidas dad esser generus e dir gea a quella proposta.» La maioritad dals deputads che han prendì il pled era d'auter avis: Che en vista a la situaziun economica malsegira saja da renunziar ad in ulteriur di da festa, è stà l'opiniun p.ex. da *Claudia Troncana-Sauer* (pld, Engiadin'Ota), *Martin Wieland* (pld, Trin) ed *Ernst Sax* (pcd, Rueun).

Cler resultat per ils 1. da matg sco di da lavur

Cussegljer guvernativ Martin Jäger ha menziunà che mo quatter da las 35 posiziuns entradas hajan pretendì il 1. da matg sco di da festa, «perquai è la regenza dal medem avis sco la maioritad da la cumissiun.» Cun 98:16 vuschs ha refusà il cussegl grond la proposta da stgaffir il 1. da matg in nov di da festa. Ils ulteriurs puncts da la revisiun parziala n'han dà bler da discurren. Cun 111:0 vuschs e naginas abstenziuns da la vusch ha approvà il parlament grischun la revisiun parziala da la lescha davart ils dis da paus sco proponida da la regenza.